

茹菌筍

草

編譜譜



菌

譜

陳仁玉
撰

中
華
書
局

菌譜

宋 陳仁玉 撰

芝菌皆氣苗也。靈華三秀稱瑞尚矣。朝菌晦朔。莊生訕之。至若儔其食品。古則未聞。自商山茹芝。而五臺天花。亦甲羣彙。仙居介台括。叢山入天。仙靈所宮。爰產異菌。林居巖棲者。左右芼之。固黎莧之至腴。蓴葵之上瑞。比或以養王公。登玉食。自有此山。卽有此菌。未有此遇也。遇不遇無預菌事。緊欲盡菌之性。而究其用。第其品作菌譜。淳祐乙巳秋九月。山人陳仁玉序。

合蕈

邑極西章光山。高竄秀異。寒極雪收。林木堅瘦。春氣微欲動。土鬆芽活。此菌候也。菌質外褐色。肌理玉潔。芳薌韻味發釜鬲。聞百步外。蓋菌多種。例柔美。皆無香。獨合蕈香與味稱。雖靈芝天花無是也。非全德耶。宜特尊之以冠諸菌。合蕈始名。舊傳昔嘗上進。標以台蕈。上遙見誤讀。因承誤云。數十年來。旣充苞貢。山獠得善賈。率曝乾以售。罕獲生致。邑孟溪山中。亦同時產。惟蕈柄高。無香氣。土人以是別於章光焉。

稠膏蕈

邑西北孟谿山。宵邃深莫測。秋中山氣重。霏雨零露浸釀。山脊木腴。蓓爲菌。花戢戢。多生山絕頂高樹杪。初如藥珠。圓瑩類輕酥。滴乳淺黃白色。味尤甘勝。已乃傘張。大幾掌。味頓渝矣。春時亦間生。不能多。稠膏

得名。土人謂稠木膏液所生耳。合蕈。他邦猶或有之。此菌獨此邑。此山所產。故尤可貴。靈法當徐下鼎釜。伺涓沸瀉起。謹勿七撓。撓則涎腥不可食。性參和衆味而特全於酒。烹齊既調。溫厚滑甘。雉尾尊不足道也。或欲致遠。則復湯蒸熟。貯之瓶罍。然其味去出山遠矣。

栗殼蕈

寒氣至。稠膏將盡。栗殼色者。則其續也。尚有典刑焉。

松蕈

生松陰。採無時。凡物松出。無不可愛。松葉與脂。伏靈琥珀。皆松裔也。昔之遁山服食求長年者。寔松焉依。人有病洩瀉不禁者。偶掇松下菌。病良已。此其効也。

竹蕈

生竹根。味極甘。當與筍通譜。而菌爲北阮矣。

麥蕈

多生溪邊沙壤鬆土中。俗名麥丹蕈。未詳。味殊美絕。類北方摩姑蕈。品最優。

玉蕈

生山中。初寒時。色潔皙可愛。故謚爲玉。然作羹微韌。俗名寒蒲蕈。

黃蕈

叢生山中。梔鬱黃色。俗名黃纒蕈。又有名黃狹者。殊峭硬有味。

紫蕈

纒紫色。亦山中產。俗名紫富蕈。品爲下。

四季蕈

生林木中。味甘而肌理麗峭。不入品。

鵝膏蕈

生高山。狀類鵝子。久乃繖開。味殊甘滑。不謝稠膏。然與杜鵑相亂。杜鵑者。生土中。俗言毒蠱氣所成。食之殺人。甚美有惡。宜在所躡。食肉不食馬肝。未爲不知味也。凡中其毒者。必笑解之。宜以苦茗雜白礬勺新水併咽之。無不立愈。因著之。俾山居者。享其美而遠其害。此譜外意也。